

vene el ducha contra, et lo acompagnò a l' abitation et posto ordine darli audentia a hore 22; quel zorno andono in castello, era col ducha el cardinal fiol dil ducha di Ferrara ch' è arzivescovo di Milan et sui consejeri, mandò tutti fuora, et rimase *solum* esso ducha col cardinal et secretarii, e disse come era fiol di la Signoria, et havia il stato ha per quella, *licet* si dichì la Signoria zereha tirar franzesi a so danni, *tamen* per questo non vol restar di esser fiol di la Signoria, et in queste expedition di turchi la Signoria comanda e vedarà lui sarà prontissimo. Or l' orator Badoer rispose: diria a la Signoria questo li havia soa excelentia ditto, e tolto licentia el zorno seguente si partiria. *Item*, da novo era che misier Zuam Giacomo Triulzi havia tolto Anzisa terra raccomandata al ducha di Milan, et il signor Constantin havia tolto uno castello in Lunesana, mia 4 lontan da Casal, e che 'l ducha havia cressuto li daciij et quinto più, et il Badoer non scrisse.

*Da Bergamo, di sier Hironimo Orio e sier Francesco Bacadona rectori, di 4.* Avisano nove de' sguizari, quali prosperano contro tedeschi, e dicono voler intrar in Valtelina ch' è dil ducha di Milan, perchè dal ducha non hanno potuto haver vituarie.

È da saper, ozi a cavallo fu fato li balestrieri di galia, soracomito sier Valerio Marzelo, andò tre di lhorò savii ai ordeni, io non vi volsi andar. *Item*, fu fato la zereha di le galie di Baruto et di Alexandria per li lhorò capitani, di hordine di la Signoria, sier Piero Barbo et sier Alvixe Zorzi, perhò che nui savii ai ordeni non volessemo andar.

354 Adì 9 lujo. In collegio. Non fu il principe. Vene do oratori di Trau con lettere di credenza: pregando la Signoria fusse remosso de li Dimitri Lascari capo di stratioti, perhò che quella comunità non el voleva per niente, perchè fazeva molti inconvenienti. *Item*, pregono li sia dato monition et biscoto per il Castel di Vituri. Fo comesso al nostro ordene.

Vene l' orator di Monferà in la materia di misier Marquardo; li fo risposto si li havia risposto ben.

*Da Turin, di Zuan Dolze secretario, di 5 di l'istante.* Come franzesi venivano zoso. Et che il re di romani era in uno castello chiamato Vitrich, et sguizari lo seguivano; et che si prachava acordo tra sguizari e ditto re; et misier Galeazo Visconti fu scontrato da uno Borso, sta in corte dil ducha di Savoja, in val Augusta, che andava con 50 cavali et 8 cariazi da'sguizeri a questo effeto; et el ducha di Savoja à mandato do oratori al re de' romani e nomina quali, *videlicet* domino Agnelino Provano presidente dil patrimonio et monsignor di Mantoa. *Item*, che la

compagnia dil ducha di Valentinoes veniva di qua da' monti.

*Da Bergamo, di rectori, di 5.* Come el re di romani havia fato comandamento in scrittura a Ala et altri luogi: che tutti chi poleno portar arme debino andar in campo in suo ajuto, quali andavano mal volentieri.

In questa matina fo scritto a sier Zuan Malipiero et sier Valerio Marzelo, si parte ozi soracomiti, e comandatoli debino andar insieme, si per custodia dil golfo qual per andar sicuri. Et atento non si havia lettere da mar, che era gran fato, et dubitavano non fusseno le lettere intercepte da le fuste turchesche, fo dito si armava a la Valona, *unde* per collegio fo scritto a Corphù, scrivi lettere per la via di Otranto, *etiam* fo ordinato li penesi andasseno su le galie etc.

È da saper, intisi el ducha di Milan ha in questa terra che sono in la procuratia zoje in pegno per ducati 50 milia, zoè diamanti 4, balasi et perle quale sono in scatole bolade, et dà per ogni paga per il Monte nuovo ducati 4000 a l'anno. *Item*, intisi che al Cajero è contrade 18 milia e volze 40 mia; et che la rayna di Cipro si chiama schiava dil soldam, et ha di Cipro di provision ducati 4500, et di Asolo ducati 3500.

Da poi disnar, fo pregadi. E poi leto le lettere, intrò consejo di X con zonta di danari, fo ditto era per mandar a dimandar li ducati 50 milia al ducha di Milan li fono prestati su zoje. Et è da saper, non si sapea dove le fusseno, *tamen* niente fu fato per esser il tempo di mandar ducati 2000 di la paga, perhò che tre mexi avanti è ubligato a mandar li danari.

Fu posto una sola parte, per io Marin Sanudo e sier Zuan Moro savii ai ordeni: che a li nobeli di Acque morte li sia resalvò el primo viazo si meteria in Acque morte: have 4 di no. *Etiam*, poi in gran consejo fu posto parte: che sier Andrea Foscolo electo capetano di ditte galie potesse esser electo, et fu presa.

*Da Roverè, di sier Nicolò da cha da Pexaro podestà, di 8.* Come havia nova il campo regio, da persone 8 o 9 milia, esser a Laz, e agnelini e sguizeri sono stati 5 zorni in val Venosa, e brusono Slander, et Bolzan dubita assai, et a Trento è sta scritta una lettera, la Signoria nostra vol romper al re in Friul e mandava zente, e ditto re è a Vitrich, et à da far assai.